

Sel Prestuhn
Thomas S. Monson



Sifilpac konwacack Nguhnin Christmas

Oacna sie elder fuhsr ke yac somlah ah, pahngonyuck nga wi mwet sahyac nuh ke sie lohm ono fin acn Salt Lake City in sang ahkinsewowo nuh sin tuhlihk mas. Ke kuht utyak ah, kuht akikhlen soko sahk in Christmas ke lahm na kahlwem ac wowo ac liye nuk pihplac arlac wo ye lah maelihk kac ah. Na kuht fahsr ahluhkwelah lun lohm sac nuh ke acn ma tuhlihk mukul ac muhtwacn srihsrihk ah—kuhtuh simacnlac paho kuh niyac ah, kuhtuh suhkahpahslah ma sahp tiac kuh in sa onweyucklac—pain kuht ke ngwetngwet kuhlzacng.

Sie tuhlihk mukul fuhsr, mas na upac pahngonyuc, “Suc inem an?”

Nga fahk nuh sel inek, ac el siyuck, “Kom kuh in ahkinsewowoyeuclac?”

Ahkinsewowo sac ituckyang, ac ke kuht forlah in som liki siskacn mwe oan lah ah, el fahk, “Kuloh na ma luhlahp.”

Kuht fahsr nuh met kuhtuh, na nga lohng el pahng, “O, Tamuhlwel Monson, merry Christmas nuh sum.” Na sie isracsr na wowo oreklac ke muhtahl.

Oasr nguhnin Christmas sin tuhlihk mukul sac. Nguhnin Christmas pa sie ma nga finsrakkihn in oasr lasr noh-fohn ke insiyacsr ac moul lasr uh—tiac ke puhlan pacl se inge muhkwenah tuhsruhk ke yac na fohn sac.

Ke oasr nguhnin Christmas lasr uh, kuht ac esamuhl suc puhtte la ma kuht ahkfuhlwactye ke puhlan pacl se inge ke yac uh: “Tuh isuslac nuh suwos mihsenge in siti

sel David sie Mwet Lahngo, suc Leum Christ” (Luke 2:11).

Ke lwen lasr uh nguhnin sang mwe sang uh oruh sie atac na yohk in ahkfuhlwactye pacl in Christmas uh. Nga nuhnkuh fin oasr ma kuht kuh in eis ke kuht sifacna siyuck, Mwe sang fuhkah ma Leum el kena *ngan* sang nuh Sel kuh nuh sin mwet sahyac uh ke pacl sacohk se inge ke yac se?

Lwelah nga in fahk lah Pahpah tuhmasr Inkuhsrao el luhngse kais sie sesr in fohlohkihn nuh Sel ac nuh sin Wen Nahtuhl mwe sang ke ahkostwen. Nga puhlah pac lah El ac siyuck sesr in iskuhtyang sifacna ac tiac srohwohsr kuh rahpkuh kuh akuhkuhin, oacna ke Wen sacohk Nahtuhl fahk ke Puk luhn Mormon an:

Mwet Lahngo el luti lah elos suc oasr nguhn in akuhkuhin la uh tiac ma Sel tuhsruhk ma sel setuhn, suc pa pahpah tuhmuhn akuhkuhin ac suc moklweack insiacn mwet in akuhkuhin ke kasrkuhsrak nuh sin sie sin sie.

Mwet Lahngo el fahk lah tiac mwe luti Lal in moklweack insiyacn mwet uh ke kasrkuhsrak lain sie sin sie, tuhsruhk tuh mwe luti Lal pa kain ingacn in wacngihnlac (liye 3 Nephi 11:29 30).

Ke fihl in pacl wolacna ke fohnlah luhn pacl uh, pacl wo lasr in luhngse ac eiskuhtyang uh pwacyelah wacngihn sahflahiyac, tuhsruhk elos kuh pac in oasr muhkwenah ke pacl fal nuh sesr in kahsrh uh. Mihsenge oasr inse in ahkenganye, kahs kuhlzacng in fahk, orekma in oreklac, ac nguha in moliyucklac.

Sie mwet suc fokoko nuhnak la ke nguahnin Christmas suhmuhslah:

Nga pa nguahnin Christmas uh—

Nga utyak nuh in lohmu luhn suhkahsruh, orwacalah muhtuhn tuhlihk suhpwacr uh in ikucsaclihk muhtahl, ke nuhnak pwacr.

Nga orwacalah poun mwet rahpkuh se in monglac ac srolwacalah sie acn kahlwem ke nguahnal.

Nga orwacalah mwet mahtuh in ahksasucyelah pacl fuhsr lalos ac in isrwacsr oacna ke elos fuhsr ah.

Nga oruh luhngse moul na ke insiyacn tuhlihk ah, ac ahkwoye mutul lalos uh ke muwemwe wo.

Nga orwacalah niyac rahrah uh in sang kahsruh nuh sin mwet enenuh uh, fihliyac inse lut uh ke wolacna luhn facuh.

Nga orwacalah mwet suhnuhntac in tui kihtin pacl ke inkacnek upac, eis pacl ac suhpwacalah sie ma nuh sin sie mwet luhngse kena yohk ma fuhlwelah sronin muhta engan uh—sronin muhta ma eslah iken ahsor uh.

Nga ilyak nuh lun acn kacpous lohsr uh, ahkacsmakihnye mukul kantweyucki uh ke ma kuh in sikyak ac ahkahlwemye ke lwen wowo ma soenna sikyak uh.

Nga tuhkuh kahkahrhik nuh ke sie lohmu fasrfasr, mihs ke kweok, ac inngoasro ma muhnahs in sramsram tuh rarrar ke ahkahlwemye tarilacna mihs.

Ke inkacnek tausin, nga oruh facuh muhnahs se in ngwetwack nuh ke muhtuhn God, ac ke kihtin pacl muhkuhnlah ma ma srihk ac kweok uh.

Nga pa Nguahnin Christmas.¹

Lwelah kais sie sesr in sifilpac sokwack nguahnin Christmas uh—finne ke Nguahn luhn Kraist.

MWE KAHSRUH

1. E. C. Baird, "Christmas Spirit," ke James S. Hewitt, ed., *Illustrations Unlimited* (1988), 81.

LUTI KE PWENG SE INGE

Ke kom akacsruhi ke pweng lal Prestuhn Monson yurin sucu an, nuhnkuh in ahkyohkye kihsen siyuck el siyuck ke mwe sang fuhkah ma Leum el ke kuht in sang nuh Sel kuh nuh sin mwet sahyac ke puhlan pacl se inge. Ahkkweye mwet ke sucu an in esamyac nuhnak ac mwe sramsram an (kuh, nuh sin tuhlihk srihsrihk an,

in srolwacalah sie petsac) ke ohiyac in "sifilpac sokwack nguahnin Christmas—finne Nguahn luhn Kraist."

MWET FUHSR

Ekuh Wowo se Met liki Lwen in Christmas

Sel Jerie S. Jacobs

Ke nga kapkapwack ah, sie sin ip wo emet ke yac nuh kwewa uh pa Ekuh Met liki Lwen in Christmas. Nga ac sucu luhk ah orwacalah pitsa, som fahsr on, na tuhkweni nuh ke sie alu in Christmas. Kuht onkihn on in alu uh ke puhsrwen on rarrar ahkosr ac sritackihni kuhfwen mwe on nahtuhsr uh arlac yohk puhsra. Pahpah el kwacna ahksahfyelah ekuh sacn ke sie nuhnak ke Christmas ma ahksohrohrye muhtahsr ke engan. Moul uh tiacna oreklac wo oacna Ekuh Met liki Lwen in Christmas uh.

Ke nga mahtuhack ah, ninac kiyuck ah muhtwacwacack karihngihni sie mwet tuhlan fuhsr, Kelly. Kelly el tuhkuh nuh lohmu sesr ah lwen nuh kwewa tukun lutlut ah ke ninac kiyack ah, Patty, el orekma uh. Kelly el ukweyuc oacna soko kosro srihsrihk—wohwohn ac enenuh. Kwacna mwe mongi se ke Patty elac sruhk wack tuhlihk muhtwacn se nahtuhl an ac som liki lohmu sihk ac sucu luhk ah ke mihs uh.

Ke Tisacmpuh, nga elyahyak ke ninac el solwack Patty ac Kelly in wi kuht ke Ekuh Met liki Lwen in Christmas ah. Ekuh Met liki Lwen in Christmas *luhk*. Ninac el isrwacsr ac ahkkweye nuh sihk, "Ac tiac ekuhllah kuhtwena ma." Tuhsruhkuh nga etuhna lah ac ekuhllah ma. Eltahl ac kanglah nohfohn pitsa nwacsr ah. Kelly el ac isrucn onon lasr ah. Nga tuhpanna ac etuhna lah ac Ekuh Met liki Lwen in Christmas na koluk se.

Ke ekwelac ah, Patty ac Kelly wi kuhtyang, ac kuht sramsram ac isrwacsr ac on. Pwacye sin ninac kiyuck ah. Ma sac arulacna wo. Ke infulwacn fong ah elos fahk kuloh nuh sesr ac kohslah na som. Nga som mutullac ke inse sesseslah ke luhngse. Nga sokwack lah mwe sang sacohk na pwacye ke Christmas uh tiacna wacngihnlac ke kuht akacsruhi uh. Sahyacna elos wo likina ac puh-seni ke kuht kihtacloslac uh.

© 2012 sel Intellectual Reserve, Inc. Kuh ac suwohs nuh kwewa fihliyucki. Sihmlac fin acn USA. Ahkkweyeyucklac ke kahs English: 6/11. Ahkkweyeyucklac ke lweng: 6/11. Lwenglah luhn *First Presidency Message, December 2012*. Kosraean. 10372 868



Forfor Luti, sie Orekma luhn Molwelah

Luhlahlfongi, Sucu, Kahsruh

Pruhe in lutlutkihn kuhfa inge ac, ke pacl fal an, sramsramkihn yurin tahmtahel ma kowos muhtwacta nuh yohroh an. Orekmakihn kihsen siyuck an in kahsrwe kowos ahkkweye tahmtahel wiyowos an ac in oruh Rilif Sosaiti in ip utuftufse ke moul lowos sifacna an.

Forfor luti uh sang nuh sin muhtwacn uh pacl wowo in karihngihn, ahkkweye, ac luti sie sin sie el sie—orekma na pwacye luhn molwelah. Ke forfor luti, lutlut luhn tahmtahel uh ke aholyacn Mwet Lahngo ac kahsruh ahkoelah muhtwacn uh nuh ke mwe in sewowo ke moul ma pahtpaht uh.

“Kuht pa ‘in sensenkihn, ahkuhtweyac, kwacfe, ac luti, ac suli [mwet sahyac uh] in tuhkuh nuh yurin Kraist’ (liye D&C 20:59), oacna ke Leum el fahk ke fwackyuck lal ah,” Prestuhn Spencer W. Kimball el fahk (1895–1985). Sifilpac, el fahk, “Fahkwack luhlahlfongi lom pa sie inkacnek na wo in sruhmuhn sie pweng.”¹

Ke kuht mwet forfor luti uh ahkyohkye etwacack lasr ke ma pwacye ke wosasuc uh, fahkwack luhlahlfongi lasr uh ahkkweyeyuck ac tahpuhk tahmtahel ma ahkolah in pacptaislac ac ahkkweyeyucklac uh. Kuht kahsruh mempucr sasuc uh in wi ma nuh kwewa ke wosasuc uh. Muhtwacta ac luhngse lasr uh kahsruh “fohlohkohnma elos suc tuhlacl [ac] ahkfokokoye insiyaclos suc muhnahslah ke wosasuc uh.”² Ac kuht ahkkweye tahmtahel uh in tuhkuh nuh yurin Kraist ke wi nuh tempuhl uh.

“Kom ac molwelah nguhna uh,” Prestuhn Kimball el fahk nuh sin

mwet forfor luti uh, “ac suc kuh in fahk tuhsruhk tuh mwet fokoko wolacna pucspucs ke Alu mihse- nge uh fokoko ke srihpen kowos oasr in lohmselos an ac sang nuh selos sie ngwetngwet sasuc, sie aruhrruhma sasuc. Kowos ahk- kahlwemye nuh selos ma elos tiac etuh. Kowos ahkyohkye pekuhsra lalos an. . . .

“Kowos liye, kowos tiac molwe- lah muhkwenah tahmtahel inge, tuhsruhk oacyacpac mukul tuhmwaclos ac lohmselos uh.”³

Ke Ma Suhmuhsalah uh

Doctrine and Covenants 20:59; 84:106; 138:56

Ke Sramsram Mahtuh Lasr

Ke Mwet Pahluh Joseph Smith el akiyac Rilif Sosaiti ah, el fahk lah muhtwacn uh ac tiac karihngihn muhkwenah mwet suhkahsruh uh tuhsruhk oacyacpac molwe- lah nguhna uh. El oacyacpac luti muhtwacn ke Alu uh in eis kunoh- kohn yohk srihpac ke plwacn in molwelah luhn Pahpah Lucng uh.⁴ Kolyuck ke ip yohk ma lutiuyuck sel Mwet Pahluh Joseph Smith, kuht ma ekihn tahmtahel ke Rilif Sosaiti uh kuh in tuhkweni orekma in ahkoe- lah muhtwacn ac sucu lalos uh nuh ke mwe in sewowo yohk emet luhn God uh.

Lwelah kuht in luhngse sie sin sie,” Prestuhn Brigham Young el fahk (1801–77), “ac lwelah [elos suc] fokoko in kahsruh mwet muh- nahs in kuhi, ac lwelah elos suc kuh in liye in kol mwet kun uh ne ke elos kuh in sifacna liye inkac- nek uh.”⁵

MWE KAHSRUH

1. Spencer W. Kimball, ke *Daughters in My Kingdom: The History and Work of Relief Society* (2011), 116.
2. Eliza R. Snow, ke *Daughters in My Kingdom*, 83.
3. Spencer W. Kimball, ke *Daughters in My Kingdom*, 117.
4. Liye Joseph Smith, ke *Daughters in My Kingdom*, 171–72.
5. Brigham Young, ke *Daughters in My Kingdom*, 107.

Meac Nga Kuh In Oruh Uh?

1. Rilif Sosaiti uh ahkoeyuclac fuhkah nuh ke mwe in sewowo ke moul ma pahtpaht uh?
2. Meac nga kuh in oruh in ahk- yohkye luhlahlfongi luhn mwet nga karihngihn uh?

Nuh ke kuhtuh pac ma in etuh, som nuh ke reliefsociety.lds.org.

© 2012 sel Intellectual Reserve, Inc. Kuh ac suwohs nuh kwewa fihliuyucki. Sihmlac fin acn USA. Ahkkweyeyucklac ke kahs English: 6/11. Ahkkweyeyucklac ke lweng: 6/11. Lwenglah luhn *Visiting Teaching Message, December 2012*. Kosraean. 10372 868